



Rabu, 06 September 2023

Ogen : Perb. Rasul 8:28-31



Ngangkai Si Oge



Ngoge, sada dahin si mekatep silakoken. Buku, koran, majalah, bage pe situs-situs entah artikel-artikel sidebanna. Bas buena enggo sioge piga nge si angkai ogen e?

Sekalak Menteri bas Etiopia nari, bas perdalanen mulihna ersembah i Jerusalem nari, i ogena sada bagin bas kitab Jesaya. Ioge-ogena kitab e tapi la iantusina ertina. Erdandanken si e reh me Pilipus njumpai ia, janah nungkun antusen siniogena e. kepeken kai siogena la iantusina sabap nina " ja ka nge banci kuangka adi la lit si nerangkencan man bangku."

Melala dampar si maun erbahanca la terantusi kita kai si nioge. Banci erkiteken kurang konsentrasi, bas paksa latih, entah banci ka nge melala kata-kata si la semal si nioge (ipake bahasa-bahasa asing) ras sidebanna. La ngangkai kai sinioge erbahanca la ndatken pesan, entah tujun bas tulisen sinioge e. Tambah tolona banci ka peturah salah pengertin nandangi isi ogen e. Erdandanken si e perlu kel iantusi, entah iangkai kai si nioge kita e arah ngenehen tema entah judul tulisen e. Judul e mabai perukurenta ku ja arahen tulisen, ogelah alu manjar-anjar alu konsentrasi. Kune e pe langga sidatken pengertinna, sungkunlah teman-teman si deban si banci nuriken antusenna. Bagi silakoken Menteri Etopia, bas si la iangkana e erpenungkunen ia seh maka tangkas man bana pesan siisehken ogen e man bana.

Moria si pentar e me Moria si ngoge. Erbage-bage ogen moria, salah sadana e me buku bimbingan Moria alu tujun banci mabai moria ngantusi isi pustaka. I je me iagar-gari terdauhen kerna kata ajar, pedah pustaka erpalasken tema si lit. Pengarapenta buku e mereken pengertin ras ngaruh simbelin man Moria. Guna si e niarapken kita selaku Moria banci ngoge dengen ndatken atusen sinioge.

 *Gargarilah pesan bas tep-tep ogen siniogendu*

